

NGA MAHI

A TE

HUI O TE HAHI MAORI

O TE TAKIWA O

HERETAUNGA

I TE PIHOPATANGA O WAIAPU,

I HUIHUI KI OMAAHU, APERIRA 7, 1874.



NAPIER :

PRINTED BY DINWIDDIE, MORRISON & CO.,

“ HERALD ” OFFICE.

1874.

# NGA TANGATA O TENEI HUI.

## UPOKO.

\* TE PIHOPA O WAIAPU.

## MINITA.

|                     |     |     |     |                     |
|---------------------|-----|-----|-----|---------------------|
| VEN. W. L. WILLIAMS | ... | ... | ... | Atirikona o Waiapu. |
| REV. T. HUATA       | ... | ... | ... | Te Wairoa.          |
| REV. S. WILLIAMS    | ... | ... | ... | Te Aute.            |
| * REV. H. POHUTU    | ... | ... | ... | Nukutaurua.         |

## MANGAI REIMANA.

|                    |     |     |     |     |              |
|--------------------|-----|-----|-----|-----|--------------|
| * PITA TAUHOU      | ... | ... | ... | ... | Nukutaurua.  |
| (Kahore)           | ... | ... | ... | ... | Nuhaka.      |
| * TE OTENE PIKOWAI | ... | ... | ... | ... | Te Wairoa.   |
| (Kahore)           | ... | ... | ... | ... | Te Wairoa.   |
| * HOERA TE KAHU    | ... | ... | ... | ... | Mohaka.      |
| NOA TE HUKU        | ... | ... | ... | ... | Omaahu.      |
| HENARE TOMOANA     | ... | ... | ... | ... | Pakowhai.    |
| (Kahore)           | ... | ... | ... | ... | Waiohiki.    |
| * NIKERA           | ... | ... | ... | ... | Te Pakipaki. |
| (Kahore)           | ... | ... | ... | ... | Te Aute.     |
| (Kahore)           | ... | ... | ... | ... | Ruataniwha.  |
| (Kahore)           | ... | ... | ... | ... | Porangahau.  |
| (Kahore)           | ... | ... | ... | ... | Waimarama.   |

\* Kihai enei i tae ki te Hui.

## HE KI

NA TE HUI O TE HAHĪ MAORĪ O TE TAKIWA O HERETAUNGA I WHAKAPUAKINA I TE TAU 1874.

### I.—MO TE KURA RATAPU.

Tetahi mate nui o te Hahi i tenei wa, ko nga tamariki e whakatupuria kuwaretia ana, kahore e whakaakona ki nga tikanga o te Rongo-pai. Me titiro tenei mate e nga tangata o ia wahi, o ia wahi, ka whakaputa ai i te whakaaro kia whakaakona nga tamariki i nga Ratapu, kia tokomaha hoki nga kai-whakaako, kia mama ai te mahi.

### II.—MO NGA WHARE-KARAKIA KIA HANGAA.

Kia puta he kupu ma tenei Hui ki nga Rangatira me nga tangata o nga kaainga kahore ano he whare, kia hohoro-tia te whakatu i nga whare-karakia, i nga whare-minita. Ahakoa kua mahia tenei kupu i era tunga o te Hui, kahore ano i rite.

### III.—MO TE PUREI KAARI.

Tetahi mahi nui, kei nga kaainga katoa nei, he purei kaari, na nga wahine, na nga tamariki, na nga tane; heoi kia puta he kupu ma tenei Hui, kia mutu tera mahi; kia tahuri ia tangata, ia tangata ki te ako i tana tamaiti ki tetahi reta, ki era atu mea pai hoki o te Hahi.

### IV.—MO NGA MANGAI REIMANA.

He kupu tenei na tenei Hui ki nga tangata o nga kaainga o tenei Takiwa, kahore ano i tuku tangata mai ki roto ki te Hui o te Hahi Maori, kia tahuri mai ano ratou ki tenei mahi, kia tukua mai ano hoki he Mangai mo ratou ki roto ki te Hui i enei wa e takoto ake nei; kia ngahau ai te rapu i nga tikanga e tupu pai ai te mahi a te Hahi.

### V.—MO TE KORE MINITA.

Kei te pouri tenei Hui ki te kore Minita mo te nuinga o nga kaainga o tenei Takiwa. He korero hoki tenei ki te Pihopa, me kore e kitea e ia etahi tangata, o hea ranei, hei Minita mo aua kaainga nei.

### VI.—MO TE HUI O TE TAU 1875.

Ko te kaainga mo te Hui o te Hahi, i tenei tau e haere ake nei, ko Te Aute.

## HE KI KUA WHAKAPUAKINA I ERA TAU.

### I.—MO Nga Mahi a Nga Pariha.

E pai ana kia waiho nga tikanga a te Hui o te Hahi Maori o te Takiwa o Turanga, mo nga mahi a nga Pariha, hei tikanga mo te Hahi o tenei Takiwa.—1871.

### II.—MO TE TANGIHANGA TUPAPAKU.

E whakaae ana tenei Hui ki te he o tenei mahi o te tangihanga tupapaku, he mahi whakarawakore i te pani, i te pouaru. He whakahau hoki tenei ki nga tangata o tenei Takiwa, kia whakarerea taua mahi.—1871.

### III.—MO TE KAWA I TE RONGO-PAI.

Kia puta te whakaaro o nga tangata o ia kaainga, o ia kaainga, o tenei Takiwa ki te kohikohi i etahi moni mo te kawa i te Rongo-pai ki nga tauwi, ki nga mea kahore ano kia rongo noa ki te mahi whakaora a Te Karaiti.—1871.

### IV.—MO Nga Kai-whakaako.

He kupu tenei kia puta ano te whakaaro o ia pariha, o ia pariha, kia kohikohia he oranga mo nga kai-karakia e karangatia nei he “kai-whakaako” te ingoa.—1871.

### V.—MO Nga Kura.

1. Kia puta te whakaaro a te iwi, i nga kaainga kahore ano kia rato i te kura mo a ratou tamariki, kia whakaturia he kura mo ia kaainga, mo ia kaainga.

2. Kia tirohia e nga tangata o te Hahi, i nga wahi e whai kura ana mo nga tamariki, tetahi tikanga e whakaakona ai nga tamariki o te kura ki nga tikanga o te Rongo-pai, kia pakari ai to ratou matauranga.

3. Ko te tikanga pai mo te kura i Te Aute, kia tiro-tirohia i ia wahi, i ia wahi, etahi o nga tamariki kakama ki te ako, o nga mea ata noho, hei tamariki mo taua kura; me kore e puta i reira etahi tangata whai-whakaaro ki nga mahi a te Hahi i roto i enei wa e takoto ake nei.—1872.

### VI.—MO Nga Kaainga Minita-kore.

Kia puta te kupu a tenei Hui ki te Pihopa, me kore e kitea e ia tetahi tikanga e tu ai he Minita mo nga kaainga kahore nei he Minita.—1872.

## VII.—MO NGA TAITAMARIKI.

Kia puta te kupu a tenei Hui ki nga tangata whakaaro o te Hahi puta noa i tenei Takiwa, kia whakahaua nga taitamariki o ia wahi, o ia wahi, kia tahuri ki te korero mo te whakaunga; kia ata mohio ai ratou ki nga tikanga o te Rongo-pai, kia whiwhi ai hoki ki te pai i runga i te karakia.—1872.

## VIII.—MO NGA WHARE-KARAKIA KIA HANGA.

Ko nga tangata o nga kaainga kahore nei he whare-karakia, kia puta to ratou whakaaro kia hangaa he whare karakia mo ratou.—1872.



## TAPIRI.

TE WHAIKORERO A TE UPOKO, APERIRA 7, 1874.

E HOA MA, E NGĀ MINITA, E NGĀ MANGAI O TE IWI;—

Ka roa te takiwa i muri o tera hui o tatou, no Tihema rawa o te tau 1872. He raruraru i taua wa i kore ai e rite te haere mai o ngā tangata o te nuinga o ngā kaainga. Inaianei ka whakamatauria ano te Hui me kore e kitea tetahi pai i roto. Tirohia te ahua o te Hahi i te tuatahi. I te tae-nga mai o te whakapono ka tere katoa mai te tangata ki te tango. He mea hou i reira, i whakaarohia hoki ngā pai e puta mai ana i runga o te whakapono. Te mahi maori onamata he whawhai anake, i tenei tau, i tenei tau. I homai te Rongopai hei pehi i te mea tawhito. Heoi, ko te mea nui rawa o te Rongopai he whakamohiotanga i te tangata ki te Atua pono, ko te maunga hoki o te rongo i roto i a Ihu Karaiti, me te oranga tonutanga mo te tangata e whakapono ana ki a ia. E tere haere ana te whakapono taea noatia te takiwa o ngā whawhai. Te take o ngā raru i tupu mai na chara i te maori anake, ehara i te pakeha anake, engari no raua tahi. Na ka puta te he o te Hauhau me ona kino katoa, ka whakatika ngā iwi o tenei wahi hei awhina mo te Kawanatanga.

Ko te tapiri o te whawhai ko ngā kino katoa me te mataotao haere hoki te whakapono. E haere pai ana te tokomaha i mua; i muri mai ano ka hoki ki te he, a ka puare te ara mo ngā he katoa o te ngakau maori; ko te nui rawa hoki he haurangi me te whakarere i te karakia.

Inaianei ka mutu te whawhai ka hoki mai ano ngā pai o te rangimarie. Kia puta to tatou uaua me kore e whakahoutia te whakapono.

Kua whakaturia ngā Hui o te Hahi Maori ki era wahi o Nui Tirani, e kitea ana hoki te pai o roto. Kei konei ngā whakahaere tikanga mo ngā mea hei whakatupu i te hahi; Ka kitea hoki he mahi pai e tetahi Hui ka waiho tera hei tauira mo era atu Hui.

Ko te mea tuatahi he titiro ki te ahua o te Hahi Maori. Ki te mea e ora ana te rakau, tera ka tupu, ka nui ano ngā

hua. Ko te Hahi hoki, ki te mea e ora ana ka tupu haere, ka kitea hoki nga hua o te tika, o te tapu.

Tirohia te ahua o to tatou Hahi; engari ka nui nga mea e pouri ai tatou; kahore ano kia maranga noa i roto i nga raru o mua.

Ko te tohu nui o te ora he hiahia ki nga hui karakia, kia kaua e noho noa iho i tona whare i tona whare.

Ko tetahi tohu hoki kia pumau ona kai karakia hei whakahaere i te karakia o te tokomaha.

I era wahi o Nui Tirani kua motuhia, i roto i enei tau e rua, etahi tangata Maori hei minita, ki Akaroa, ki Otaki, ki Taranaki, ki Hauraki ki Ngapuhi hoki. I mua ko Ngatiporou te iwi i kakama ki tenei mahi. Tokoono hoki nga Minita kei Waiapu puta noa ki Turanga; tokorua kei te Wairoa kei Nukutaurua. Kahore kau o Heretaunga. Ko te tikanga ataahua tenei ki ta te Atua titiro hei whakatupu i te Hahi. I whakaritea hoki e te Karaiti nga Apotoro i te timatanga me nga akonga e whitu tekau. Na nga Apotoro hoki i ki kia whakaturia he Minita ki tera kaainga ki tera kaainga. Ki te kore e whakaaroa tenei e kore e kitea he pai.

Ko tetahi tohu o te pai ko te hanganga i nga whare karakia. He mea whakahonore tenei i te Atua he pai hoki mo te hui o te tangata.

I tera Hui o tatou ka whakapuakina he ki mo nga whare karakia “ko nga tangata o nga kaainga katoa kahore nei he whare karakia kia puta to ratou whakaaro kia hanga he whare karakia mo ratou.” Heoi kahore kau i mana tenei ki.

Ka ora te Hahi ka nui te hui o nga tangata, ka puta mai hoki nga tangata ki te Hapa a te Ariki, ina hoki ko te tino tohu tenei o te tika.

Kua puta te uaua o te Kawanatanga ki te whakatu i nga kura Maori. I te tuatahi e tere ana te mahi i nga kura ki Pakowhai ki Omaahu. E iti haere ana te huihui o nga tamariki inaianei. Me titiro te take nana i arai nga tamariki. Tera pea te raru kei te kai ma nga tamariki o tawhiti. E taea ano tenei te whakaaro e nga Komiti o te Hahi.

Kei te mahi te kura o te Aute engari ma nga tangata e haere e titiro ki te ahua.

Te mahi ma tenei Hui he tiroiro he hurihuri i nga mea e pai ai ta tatou mahi. Ko nga mea e he ana me whakato-

tika; ki te kitea hoki, he pai te mahi a tetahi moka o te Hahi, me mahi e tatou taua mahi.

Kia puta ta tatou inoi ki te Atua kia homai tona Wai-rua Tapu. Ma tana akoranga, ma te kaha hoki e homai ana e Ia, ka whai hua ai ta tatou mahi. Mana e whakahaere o tatou whakaaro me a tatou korero, kia riro mai ai he pai i roto i to tatou Hui.

